

Covid-19: 37 kes baru dengan 2 kematian hari ini

Malaysiakini

13 May 2020

Ketua Pengarah Kesihatan Dr Noor Hisham Abdullah memaklumkan terdapat 37 kes baru Covid-19 setakat tengah hari tadi.

Katanya, daripada jumlah itu, 21 kes adalah di kalangan bukan warganegara Malaysia dan terdapat empat kes import dan 33 kes penularan tempatan.

“Oleh itu, jumlah kes positif Covid-19 di Malaysia adalah sebanyak 6,779 kes dan jumlah kes aktif dengan kebolehjangkitan Covid-19 adalah 1,387 kes.

“Sehingga kini, seramai 16 kes positif Covid-19 sedang dirawat di Unit Rawatan Rapi (ICU). Daripada jumlah tersebut, empat kes memerlukan bantuan pernafasan,” katanya pada sidang media di Putrajaya.

Dr Noor Hisham juga mengumumkan terdapat pertambahan dua lagi kes kematian berkaitan Covid-19 menjadikan jumlah kumulatif kes kematian di Malaysia sebanyak 111 kes.

“Kes kematian ke-110 (kes ke-6743) merupakan lelaki warganegara Malaysia berumur 30 tahun yang ditemui mati di Rompin, Pahang.

“Kes ini di bawah siasatan pihak Polis Diraja Malaysia dan Pejabat Kesihatan Rompin. Punca jangkitan belum dikenalpasti dan masih di dalam siasatan.

“Kes kematian ke-111 (kes ke-5195) merupakan lelaki warganegara Malaysia berumur 90 tahun dan mempunyai latar belakang penyakit darah tinggi dan penyakit kronik pernafasan,” katanya.

Beliau turut memaklumkan bahawa terdapat 58 kes yang telah pulih dan dibenarkan discaj pada hari ini.

Ini menjadikan jumlah kumulatif kes yang telah pulih sepenuhnya dari Covid-19 dan telah discaj daripada wad adalah sebanyak 5,281 kes atau 77.9 peratus daripada jumlah keseluruhan kes.

Copyright © 1999-2012 Mkini Dotcom Sdn. Bhd

Source: <https://www.malaysiakini.com/news/525476>